

Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi 17/08 i 20/10), i Prijedloga odluke gradonačelnika, broj 02-01.2-000740/10 od 9. juna 2010. godine, Skupština Brčko distrikta BiH, na I. nastavku 28. redovne sjednice održanom 30. juna 2010. godine, donosi

**ODLUKU
O KRITERIJIMA SOCIJALNOG ZBRINJAVANJA RADNIKA PREDUZEĆA I
INSTITUCIJA KOJI SU, NE SVOJOM KRIVICOM, OSTALI BEZ POSLA USLJED
RATNIH DEJSTAVA**

Član 1

Ovom odlukom utvrđuju se kriteriji za socijalno zbrinjavanje radnika preduzeća i institucija koji su ostali bez posla, ne svojom krivicom, usljed ratnih dejstava.

Član 2

Odluka o socijalnom zbrinjavanju radnika preduzeća i institucija koji su ostali bez posla obuhvata radnike koji ispunjavaju opće kriterije:

- da su prestali sa radom u preduzećima i institucijama zbog ratnih dejstava i da u međuvremenu nisu zasnivali radni odnos,
- da imaju prebivalište u Brčko distriktu BiH na dan 8. 3. 2000. godine i neprekidno do dana usvajanja ove odluke.

Član 3

Ovom odlukom se utvrđuju i posebni kriteriji koje moraju ispunjavati radnici koji su ostali bez posla da bi ostvarili pravo na jednokratnu novčanu pomoć.

Član 4

Posebni kriteriji koje moraju ispunjavati radnici koji su ostali bez posla da bi ostvarili pravo na jednokratnu novčanu pomoć u 2010. godini su:

- da se nalaze na evidenciji Zavoda za zapošljavanje Brčko distrikta BiH i da imaju više od 50 godina života – žene (rođene 1960. godine i starije), odnosno muškarci preko 55 godina života (rođeni 1955. godine i stariji),
- da su brisani iz evidencije Zavoda za zapošljavanje Brčko distrikta BiH zbog starosne dobi po sili zakona, a nisu ostvarili pravo na penziju.

Član 5

Ukupan iznos sredstava namijenjenih za socijalno zbrinjavanje radnika preduzeća i institucija koji su ostali bez posla usljed ratnih dejstava u iznosu od 2.000.000,00 KM su osigurana Odlukom Skupštine Brčko distrikta BiH o usvajanju amandmana za 2009. godinu i Budžetom za 2010. godinu i nalaze se na organizacionom kodu 134 Pododjeljenja za socijalnu zaštitu, ekonomski kod 614200 – Grantovi pojedincima.

Član 6

Lista korisnika koji ispunjavaju uslove iz člana 4 će biti utvrđena na osnovu provedenog javnog poziva koji će raspisati Odjeljenje za zdravstvo – Pododjeljenje za socijalnu zaštitu.

Član 7

Za ostvarivanje prava na jednokratnu novčanu pomoć potrebno je dostaviti sljedeće dokumente:

- potvrdu o prebivalištu u Brčko distriktu BiH kao dokaz ispunjavanja uslova iz člana 2 stava 1 alineje 2,
- potvrdu da se nalazi na evidenciji Zavoda za zapošljavanje Brčko distrikta BiH ili da su po sili zakona brisani iz evidencije Zavoda za zapošljavanje zbog starosne dobi,
- obrazac M-4 tj. Uvjerenje o podacima u matičnoj evidenciji izdato od PIO-a, odnosno PIO/MIO-a.

Član 8

Raspodjelu novčanih sredstava iz člana 4 korisnicima za koje se utvrdi da imaju pravo na jednokratnu novčanu pomoć će realizovati Pododjeljenje za socijalnu zaštitu.

Član 9

Visina novčane nadoknade će biti utvrđena posebnom odlukom Vlade nakon sačinjene konačne liste korisnika, a u skladu sa raspoloživim sredstvima.

Član 10

Ova odluka stupa na snagu danom donošenja i objavit će se u Službenom glasniku Brčko distrikta BiH.

Broj: 01-02 -260/10
Brčko, 30. juna 2010. godine

PREDSJEDNIK
SKUPŠTINE BRČKO DISTRIKTA BiH

Mirsad Đapo, dipl. pravnik, s.r.